

共同經課 - 1 撒母耳記下十一章一節~十五節

1 年頭，列王出戰的時，大衛差約押，及伊的人臣及以色列的眾人出去。in 就劊贏亞捫人，圍攻拉巴。大衛猶原踎佇耶路撒冷。2 有一日，欲暗的時，大衛對床裡起來，佇王宮的厝頂行來行去，對厝頂看見一個婦仁人啲洗浴，婦仁人生做真媛，3 大衛為著彼個婦仁人就差人去探聽。有人講：「伊豈毋是以連的查某子，赫人烏利亞的某拔示巴嗎？」4 大衛差使者去導伊來，伊就來到伊遐，大衛及伊同房；婦仁人清氣伊的無清氣。就倒去 in 厝。5 婦仁人懷孕，差人給大衛講：「我已經懷孕。」6 大衛差人到約押遐，講：「你差赫人烏利亞來我遮。」約押就差烏利亞去見大衛。7 烏利亞已經來伊遐，大衛問看約押好嗎？百姓好嗎？交戰好勢嗎？8 大衛給烏利亞講：「你落去恁兜洗腳。」烏利亞出王宮了後，王就送一份食物互伊。9 總是烏利亞及伊主人的奴僕相及暍佇王宮的門口，無落去 in 兜。10 有人給大衛講：「烏利亞無落去伊的厝。」大衛就問烏利亞講：「你豈毋是對遠路來嗎？啥事毋落去你的家啊？」11 烏利亞對大衛講：「約櫃及以色列及猶大攏踎佇草寮仔，我的主約押及我的主的奴僕攏紮營佇田野，我豈通倒去我的家飲食、及我的某相及暍嗎？我指你的活及你靈魂的活來咒誓，我決斷無欲行此個事！」12 大衛給烏利亞講：「你今仔日猶原住遮，明仔再我互你去。」烏利亞就佇彼日及第二日住佇耶路撒冷。13 大衛叫烏利亞來，伊就佇伊的面前飲食，伊互伊醉。已經暗，烏利亞出去伊的床裡暍，及伊的主諸個奴僕相及做伴，也無落去 in 兜。14 隔早起，大衛寫一張批互約押，託烏利亞的手帶去。15 批內寫講：「著派烏利亞佇陣情極危急的所在，恁就對伊的後面退來，互伊受拍死。」

共同經課 - 2 詩篇十四篇

1 [大衛的詩，交互樂官。] 戇人心內講：無有上帝。in 趁邪惡，行可惡的事；無一人行好。2 耶和華對天府落看世間人，欲看有明理者，有尋求上帝者抑無。3 in 攏歪斜，一概變做污穢；無人行好，連一個亦無。4 做歹的人豈攏袂曉得嗎？in 吞食我的百姓，親像食餅，亦無求叫耶和華。5 in 佇遐大大驚惶，因為上帝佇義人的族類中。6 恁互喪鄉人的計謀變做見誚；總是耶和華做伊逃閃的所在。7 願以色列的拯救對錫安出。耶和華救伊受掠的百姓倒轉來，彼時雅各欲快樂，以色列欲歡喜。

共同經課 - 3 以弗所書三章十四節~二十一節

14 因為按呢，我跪落佇父的面前，(15 就是佇天頂地上攏總的家，對伊來號名的。) 16 求伊照伊榮光的富有，對伊的神，用權能互恁心內勇健，17 互基督對恁的信，來倚起佇恁的心，互恁有釘根下地基佇仁愛，18 才會及攏總的聖徒曉悟彼個長、闊、高、深，19 也知基督的疼，就是搬(pôaⁿ)過佇人所會知的疼，互恁照上帝齊備的充滿，來得著充滿。20 上帝會行做搬(pôaⁿ)過佇咱一切所求所想的，就是照伊所運行佇咱的權能。21 願佇教會，及佇基督耶穌，榮光歸伊到萬世，代代無息。阿們！

共同經課 - 4 約翰福音六章一節~二十一節

1 諸個事以後，耶穌過去加利利海彼旁，就是提比哩亞海。2 有多多人隨伊，是因為看見伊所行佇病人的神蹟。3 耶穌上山，及伊的學生坐佇遐。4 搬(pôaⁿ)過節就是猶太人的節近啦。5 耶穌抬目看見多多人就近伊，就給腓力講：「咱欲對叨落買餅來互諸個人食啊？」(6 伊講此個是啲試伊；因為伊家已知所欲行的。) 7 腓力應伊講：「用二百個銀仔來買餅，亦無夠額互 in 逐人得著淡薄。」8 伊的學生中一人，就是西門彼得的兄弟安得烈，給伊講：9 「佇遮一個囡仔，有五個大麥餅、二尾魚，總是將諸個互許多人有夠叨落？」10 耶穌講：「恁教許個人坐啲。」彼所在多多草，人就攏坐，數額約略五千。11 耶穌提許個餅，祝謝了後，就分互坐的人；魚亦是按呢，攏照 in 所愛。12 in 已經食飽，耶穌給伊的學生講：「捨所食剩的屑仔，免得有拍損。」13 就將所食剩五個大麥餅的餅碎，拾滿十二筐。14 許個人看見伊所行的神蹟，就講：「此個真正是所欲來世間的先知！」15 耶穌知眾人欲來，愛硬掠伊互伊做王，就閣退去入山，只有伊家已佇遐。16 黃昏暗，伊的學生落去到海邊，17 上船，欲過海去迦百農。已經暗，耶穌猶未到。18 因為風真透，海湧就愈大。19 對按呢學生划船，約略行八里抑十里，看見耶穌行海面，愈倚近船，就驚。20 若是耶穌對 in 講：「是我，免驚！」21 學生就歡喜接伊上船，船連鞭到 in 所欲去的所在。